



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 6

Yangia anidakangma :

Tir Yimym

tiryimym@aolima

tir yimym

TAPAK 8

Manipur CM-i permanent housing scheme tenzüksü

Tanur sor ita trok sülen Naomi Osaka-i tennis asayatsü




VOL. XXI NO. 34 (ADOK 34) DIMAPUR

KÜPTOKNÜ (SATURDAY)

YIMPOKSÜI (NOVEMBER) 11, 2023

₹ 5.00

Nagaland nung taoba Governor PB Acharya asü



PB Acharya (file)

Mumbai, November 10, 2023 (Agencies): Nagaland nung taoba Governor Padamanabha Balakrishna Acharya Hokolbarnep alima nungi pilaogo. Pa arishi küm 92 liasü.

Acharya-i July 14, 2014 nungi Nagaland Governor inyaktüsü tenzükä liasü. Paisa Tripura aser Assam nung Governor inyakba dang masü saka Manipur o Arunachal Pradesh nung Governor mapa repsema inyaka liasü.

Acharya-i Akhil Bharatiya Vidyarthi Parishad aser BJP nung mapa balala inyak. Karnataka nungi Margaret Alva sülenbo Governor inyaktüsü atema shimtetba nisung tanabubaji Acharya liasü. Talisa pa ya Gaud Saraswat Brahmin nungertem rongnungi mezüngbuba Governor inyaktüsü shimba nübo mezüngbuba liasü.

1995 aser 2001 tsüingda Narendra Modi-i BJP nung National General Secretary

inyakdang PB Acharya-i BJP national secretary inyak.

Acharya ya Karnataka kübok Udupi district nung aso aser Christian High School, Udupi nung class 10 tashi azüing. Iba sülen pa Mahatma Gandhi Memorial College, Udupi nung azüing aser graduate asüba sülen Mumbai Akhil Bharatiya Vidyarthi Parishad (ABVP) nung aden aser Mumbai University senate nunga züingsem ka ama inyaka liasü.

Pai Mumbai University nungi LL.B degree angu. University of Delhi Gyanodaya Express college to North East India sentong atongbaji pa liasü.

Acharya tanur asüandang nungi Rashtriya Swayamsevak Sangh (RSS) nung aden aser 1948 küm RSS mokdangdang pa ita trok tashi tepuokdak liasü. Acharya ya Akhil Bharatiya Vidyarthi Parishad (ABVP) tenzükertem rongnung ka lir aser ABVP nung pa lanuwa mapang nungi North East India dak sendakba onüktem atema inyaka aru.

PB Acharya-isa 1960s mapang North East lanurtem India den sendaktepsü atema 'Student's Experience in Interstate Living' (SEIL) sentong rongnungi mezüngbuba tenzükä inyak.

Paisa mapang talangka Uapanagr Shikshan Mandal ketdangsüa aru. Iba telok yagi Mumbai nung shisaliok reju aika lapoka lir.

Gauhati University nung 'menstrual leave' agütsür

Guwahati, November 10, 2023 (Agencies): Gauhati University (GU)-i tetsür kaketshir asoshi 'menstrual leave' tenzükogo.

India nung tetsür kaketshirtem asoshi menstrual leave mezüing agütsü tenzükbaji Kerala kübok Cochin University of Science and Technology lir. University nung students' union-i iba atema shidi ka züluba sülen January 2023 nungi menstrual leave agütsür.

Ministry of Education and

Ministry of Women and Child Development (MWCD)-i tawa tu iba atema sangdong ka agütsü aser Gauhati University (GU)-ia iba tetuyuba sülen anidaker.

Gauhati University aser affiliated colleges nung academic department ajak nungi tetsür kaketshirtemi minimum class attendance nung 2% ajemtsü. Iba tetezü tetsür kaketshirtemi 75% masü 73% attendance dang liaka semester examinations agütsütettsü.

SCERT-i Nagaland Heritage Studies Textbooks agütsütsü

Kohima, November 10, 2023 (DIPR): State Council of Educational Research and Training (SCERT), Nagaland ajanga Academic year 2024 atema textbooks anepalutsü.

Iba ya Classes 1-8 atema Nagaland Heritage Studies Textbooks aser Classes 5-8 atema Nagaland Heritage Studies Textbooks (Alternative English) lir.

Nagaland Heritage Studies

textbooks amshinüba nija school temi SCERT ajanga parnok nüngdakba textbooks meshitsü akok aser publisher nungi indangindanga malitsüla ta sorkar sangdong ka nung metetdaksüogo.

November 30, 2023 matongdang nija school ajaki pei pei nüngdakba kaket indang osang agütsütsüla aser 8014893515 ajanga tongteptsü akok ta sorkarisa metetdaksü.

JN.1 ta ser COVID variant tasen ka adoka lir

New Delhi, November 10, 2023 (Agencies): Diwali benjung tonga arudang nübortemi kanga kümdangtsüla aser talisa temang metaa shirangra anepalutsüla ta health mongintemi metetdaksüogo.

Coronavirus melenshiba ajanga JN.1 ta aser variant tasen ka kümogo aser iba ya BA.2.86 indang subtype ka lir.

World Health Organization (WHO) ajanga iba variant tasenba atema kümdanga alitsü metetdaksüogo.

JN.1 ya mutations 40 tema süogo aser Covid variant

rongnung kanga melenshiba variant ji iba ya lir. Tanabubana nung iba variant ya tang yangluteta aliba vaccine agi makoker.

Europe nung Luxembourg linük nung JN.1 variant ya mezüing puteta liasü saka England, France, Iceland aser America dena linük aika nung putetogo. Iba variant ya kanga kara prokshir anungji kümdanga alitsüla ta health nung mongin nisungtemi ashir.

Taküm September ita United States nung JN.1 strain putet aser tang tashi nung linük 11 nung

putetogo ta Centers for Disease Control and Prevention (CDC)-i metetdaksü.

"India nung tang dengue, malaria, typhoid aser viral fevers balala agi timtemba tayongzükba ajurua liaka JN.1 variant puteta mali. Anungji asükwa arudang asenoki viral fevers nungi jenbua alitsüla" ta Felix Hospital, Noida nung Dr. Zeba Khan-i ashi.

India nung JN.1 puteta meliaka iba variant ya kanga kara menateper. Iba variant ya BA.2.86 family nung dena lir aser tesüiba Covid variant tem ama shiranger ta Dr. Zeba-isa ashi.

Interlocutor Mishra-i Kuki-Zo nunger dang yimjung nung alitsü ayongzük

Imphal, November 10, 2023 (Agencies): Manipur nung Kuki telungpurtem den India sorkar atema interlocutor A. K. Mishra-i nübortem dang tensa meraksatsü mepishia metetdaksüogo.

Mishra-isa Kuki-Zo nunger dang ita tenet tema mepetmesü aruba asoshi yimtenren lemtet ka agitsü atema yimjung nung alitsü ayongzük.

Churachandpur district headquarters nung Indigenous Tribal Leaders' Forum (ITLF) lennirtem den ajurutepa

jembidang pai iba temepishiba agütsü.

Iba senden nung Ministry of Home Affairs nungi Joint Director IB (NE) Dr. Mandeep Singh Tuli aser SoO interlocutor AK Mishra na aden.

Interlocutor Mishra-i Kuki-Zo nunger dang temzüngi melaba ama yimtenren takhangba atema inyaksü aser Centre sorkari telemtetba ka agitsü merangba osang lemsatop.

Paisa ITLF dang sorkar dak temulung alemtsü aser ozüing

alema meinyaktsü mepishia metetdaksü.

Paisa Churachandpur district nung prangpong-injang auyaba meyipa agütsütsü mepishi.

Manipur nung Kuki telungpur telok 30 shi lir aser parnok 25-i India sorkar den Suspension of Operations (SoO) agia lir.

Telok 17 tashi Kuki National Organisation (KNO) aser 8 tashi United People's Front (UPF) nung dena lir. Yimtenren olemtep alitsü atema August 22, 2008 nü SoO nung sign sütepa liasü.

Navi Mumbai nung Nagaland House lapoktsü



MLA Kuzholuzo Nienu-i anir Committee on Government Assurances, NLA züingsemtemi Navi Mumbai nung aliba Nagaland House semdangdang agiba noksa ka angur.

Kohima, November 10, 2023 (DIPR): MLA Kuzholuzo Nienu-i anir Committee on Government Assurances-i November 6 aser 7 anogotem Navi Mumbai nung Nagaland House semdanga liasü.

Committee züingsem G. Ikuto, Chief Engineer, PWD (Housing) Er. Hozheto aser PWD Department o Nagaland Legislative Assembly Secretariat nungi ketdangsürtemi 'spot verification' ao.

Navi Mumbai nung Nagaland House yanglur küm 13 tashi mamshiteta aruba atema parnoki

semdang.

Iba mapang parnoki Chief Secretary Manoj Saunik IAS, Environment Department Principal Secretary & Maharashtra Coastal Zone Management Authority Chairman Pravin Darade IAS, Vice-Chairman & MD Anil Digikar IAS aser Joint MD Dr. Kailas Shinde nunger den sendentem amen.

Coastal Zone Management Plan 2019 ajanga Nagaland House building ya Coastal Regulation Zone kübok maden anungji mapang mashi ka nung

lapoka amshitsü akok ta senden amendang osang angazük.

Iba kimung ya Coastal Regulation Zone kübok adenba agi Navi Mumbai Municipal Corporation nungi Occupational Certificate manguba ajanga küm 13 tashi mamshiteta aruba liasü.

Committee on Government Assurances, NLA ajanga Maharashtra sorkar aser ketdangsürtem dang pelaba metetdaksü.

Iba ajanga Mumbai nung aliba Naga nungertem kanga ajanzüksü.

AH & Veterinary Services indang Directorate tasen semzükogo



Dimapur, Yimpoksüi/Nov. 10 (TYO): Nagaland nung Department of Animal Husbandry & Veterinary Services (AH&VS) asoshi alizüing tasen ka tongteta, November 10, 2023 nü Advisor Kazheto Kinimi-i Phezoucha, Kohima nung Directorate building tasenba semzükja liasü.

Advisor Kazheto Kinimi-i iba ki semzüksüba sentong nung jembidang, ibai AH&VS Department asoshi tongtipang anogo ka lir ta ashi aser Chief Minister Neiphu Rio-i temolung agüja iba Directorate building tasenba renemdaktsüba atema pelaba lemsatepa liasü.

Iba project tenzükjer jenjang ajak nung manokshi yariba atema pai Chief Minister's Office nem tenüngsang agüja liasü.

Iba ki tasenba ajanga

officers aser staff tem rongnung mapa inyaksü tejangraba alitsü imlar ta ashi aser tajanzük angutsüsa inyaksü nüngdaker ta ashi. Pai ajak dang tashi tasen aser tejangraba tasen nung asendenshir inyaksü ayongzükja liasü.

Engineering wing aser contractor dang pelaba ashidang, parnoki iba project yimya tajung nung tembangogo, ta Advisor Kazheto Kinimi-i ashi aser iba sentong nungsa pai 20th Livestock Census Report sayatsü.

Director, AH&VS, Dr. Nsanthung Ezung-i Directorate building tasenba yangluba otsü tongmelang agi lemsatepa liasü.

Ki tejen akumba, New Secretariat Complex nungi kanga pilaba aser mesü-menangba ajanga iba ki tasenba ya yanglutsüsa akum, ta pai ashi.

Iba ki ya May 18, 2013 nü nungi yanglu tenzük aser May 29, 2021 nung tembang aser April 5, 2023 nungi amshi tenzük.

NSSB Office lapoktsü asoshi iba building tasenba nung takdang kar agütsüba atema Secretary, Nagaland Staff Selection Board, Henok Phom-i pelaba lemsatepa liasü.

Paisa tarutsü nunga office ana tsüingta maneni amalitep akatsü tongtipang, ta shia liasü.

Iba sentong nung menden Addl. Director & MD NSDCF, Dr. Khriekuolie Linyu liasü, Mengu Suokhrie ajanga temeja ken ka aten aser Kohima Lotha Baptist Church pastor Mhonchumo S Lotha-i iba ki meshiteta sarasademsü aser Addl. Director & MD NLDB, Dr. Achila Ao ajanga melepzüing o jembia liasü.

Mokokchung DPDB senden November 16 nü amentsü Dimapur, Yimpoksüi/Nov. 10 (TYO): October aser November 2023 asoshi Mokokchung District Planning & Development Board (DPDB) senden November 16, 2023 anepdang 11:00 ako nungi tenzükja Deputy Commissioner, Mokokchung indang Conference Hall nung amentsü, ta DC & Vice Chairman, DPDB

Mokokchung, Thsuisie Phojii sangdong ka ajanga metetdaksü.

Iba senden nung department inyakyim indang PowerPoint presentation ya Office of the District Fishery Officer aser E.E PWD (National Highway) ajanga agütsütsü. DPDB züngsem ajak iba senden nung adentsü metetdaksür, ta sangdong ajanga ashi.

Chümoukedima DPDB senden nung onük balala jembia



Dimapur, Yimpoksüi/Nov. 10 (TYO): November ita asoshi Chümoukedima District Planning & Development Board (DPDB) senden November 10, 2023 nü Deputy Commissioner, Chümoukedima indang Conference Hall nung mena liasü.

Iba senden ya Advisor, Urban & Municipal Affairs, Zhaleo Rio lenisüba kübok amen, kong Chümoukedima DPDB Vice Chairman aser Deputy Commissioner, Abhinav Shivam, IAS dena liasü.

Iba senden nung SDEO Office, Medziphema nung Grade-IV Staff agi anüngba, GMS Kukidolong Village upgrade asütsüba, Emerald School, Ward 7,

Chümoukedima registration agitsüba, Tribal Common Society, Thilixu Village; Chümoukedima Plywood Veneer Industry and Transport Trade Association; aser Two-Wheeler Association, Chümoukedima registration agitsü aser Unity Village jakdang road divider indoktsü indang jembia liasü.

Board ajanga Tribal Common Society, Thilixu Village registration asütsü agizük aser danga agenda tem taruba DPDB senden nung jembitsü ayu.

Iba senden nung DPA, DDMA, Berela-i 2022-2023 küm DDMA Chümoukedima ajanga inyaksangshiba aser takok anguba osang agüja liasü.

ANGCTA Triennial Conference cum National Seminar temogo

Dimapur, Yimpoksüi/Nov. 10 (TYO): All Nagaland Government College Teachers' Association (ANGCTA) ajanga Dimapur Government College Teachers' Association (DGCTA) den lungjemer Dimapur Government College indang Central Library nung November 9-10, 2023 anogotem ayongzükba Triennial Conference cum National Seminar sentong temogo.

Iba sentong ya "Higher Education in Transition" omen nung ajemdaker agia liasü, aser iba sentong tenzükba nung tetushi tesemdang Prof. G. T. Thong, Pro Vice Chancellor, Nagaland University, Meriema Campus liasü.

Pa arudang NCC, DGC ajanga Guard of Honor agüja agizük aser DGC kaketshir temi national anthem aten aser sentong nung menden, Dr. Maongkala Longchar, Assistant Professor, Department of English ajanga tarur pela agizükba liasü. Iba sülen DGC kaketshir temi temeja ken tajung ka aten aser Prof. Sanjay Sharma, Principal, DGC ajaga pela agizükba o jembidang FYUP tenzükba aser yangji teimla aser tayongzükba aliba

indang lemsatepa liasü.

ANGCTA tir Moamongla Aier-i tir o jembidang tetushi tesemdang, tongtipang nisungtem aser stakeholders tem pela agizükba liasü. ANGCTA otsü nung Triennial Conference mezüingbuba ayongzükba atema lai pelaba lemsatepa liasü.

Lai ANGCTA kumteter liyonga aruba otsü lemsatep aser tanü tendak Higher Education jenjang asadanga jembia liasü.

Laisa skill ya subject course ka ama masü saka practical course ka kumdaktsütsü nüngdak ta ashi aser NEP 2020 ya takok ngua amshitsü ayongzükba liasü.

Tetushi tesemdang Prof. G. T. Thong, Pro Vice Chancellor, Nagaland University, Meriema Campus ajanga tesüiba mapang ANGCTA tim atemba aser iba tentet ajanga college nung temelenshi bener arutsüba indang jembia. Higher education tsütsü state nung nükla tajung aliba indang pai lemsatep aser NEP 2020 takok ngua amshitsü asoshi Nagaland nung government college tem indang ki o jen yanglushitsü ajitetba ashi.

Shisaliok tajung sayutsü asoshi aser Nagaland nung shisaliok jenjang ajungkettsü asoshi tesayur tajung shimtsü nüngdaker, ta pai ashi.

Iba sülen Titi Rongmei-i temeja ken ka tena liasü aser iba sülen ANGCTA tatong tir Dr. Lilongchem Thyug-i melepzüing o jembidang NEP 2020 ya tayongzükba ka dang lir aser lenmang balala bushia item tayongzükba koktettsü, ta ashi.

DGC Principal, Prof. Sanjay Sharma aser DGCTA tir Lhipe Naro lenisüba kübok iba mungdang ayongzükba atema pai Dimapur Government College dang pelaba lemsatepa liasü.

Dr. A. Nshoga, Director, Department of Higher Education ajanga tanü department tia indang lemsatepa liasü. Pai college nung Gross Enrollment Ration indang onük nung jembidang, enrollment asoshi 'minimum number' nüngdakbaji 3000 lir ta shi.

Nagaland ajunga nung iba minimum criteria ya St. Joseph College, Kohima-i dang tongteta lir ta pai ashi.

(Maneni tapak 8 nung...)

Nagaland indang taoba Angh PB Acharya asükhu lemsatep

Dimapur, Yimpoksüi/Nov. 10 (TYO): Raj Bhavan, Kohima ajanga Nagaland indang taoba Angh PB Acharya asüba asoshi pa kinungtsü Kavita Acharya dangi asükhu shiti ka zülua liasü.

Aseni teti meima aliba nisung ka asüba ya tayongzükba tulu lir, aser asen taoba Angh PB Acharya asüba ajanga asenok ajak temolungjang nung tazüing tuluka adokdaksür aser onoki na mangyimba angateter, ta sangdong ajanga ashi.

Pa dak telemla, aria bilemba aser ajemalu yimyatem teti bilemtetsü. Pai dangar dang temeim sayuba aser Raj Bhavan Kohima nung staff tem ajungtsü asoshi süoki ia bilemtsüba teti onok molungjang nung alitsü, ta ashi.

Pai tajemzükba jenjang nung alirtem, talisa tsürabor maliba tanurtem bendanga agütsür yariba kodanga mamatsü.

Pai mapa tajung inyaka yutsüba bilemtetdang nai temolung nung anisüngzük angutsü imlar. Iba ama tayongzükba tulu aliba mapang na kisüing masü ta bilemtetdaksüner aser na aser nür kibong den Raj Bhavan

Kohima dena lir. Tashi aser anisüngzüing asoshi onoki sarasademsür aser asür tanüla teti tatem maka tesunep nung anisüngzükjangma, ta sangdong ajanga ashi.

Nagaland indang taoba Angh, PB Acharya arishi küm 93 nung tanep Mumbai nung par kidang ajungben asüba osang angazükba aoksar aser kanga sasar, ta Nagaland Chief Minister, Neiphu Rio-i sangdong ka nung ashi.

Pai Nagaland Angh ama July 19, 2014 nungi July 31, 2019 tashi tenzükba aru aser pa mapang Nagaland nung Chief Minister asem den külemi jangratema inyakogo, ta ashi.

Pai political party ajunga den tesendaktep tajung liasü aser pai tila tanurtem kanga meima liasü.

Pa dak loktiliba, yimtenren aser ketdangsuba tsütsü sempet tajung liasü, pa ya Nagaland nung aliba nüburtem asoshi tembar tajung ka liasü. Pai jeretpereta, saksalema aser temeim agi talisa tila tanurtem asoshi inyakba atema nüburtemi kodanga mamadoktsü.

(Maneni tapak 8 nung...)

Jaishankar aser Blinken nati Hamas-Israel rara atema jembio



November 10, 2023 nü Sushma Swaraj Bhavan, New Delhi nung 5buba India-US 2+2 Ministerial Dialogue senden nung Defence Minister Rajnath Singh aser External Affairs Minister S. Jaishankar na noksa nung angur.

New Delhi, Yimpoksüi/ November 10 (Agencies): Hokolbarnü New Delhi nung 5buba India-US '2+2' ministerial senden nung External Affairs Minister, S Jaishankar aser US Secretary of State, Antony Blinken nati Hamas-Israel rara atema jembio.

Iba senden ya India-US asalentong partnership tajungba akümtsü aser region nung tongtambang onüktem atema inyaksü nükjidong nung amen.

Senden tembangba sülen Jaishankar-i 'X' ajanga, iba senden nung US ketdangser den West Asia aser Indo-Pacific nung tongtambang onüktem atema jembio, ta metetdaksü.

Kasa senden nungji US Defence Secretary, Lloyd Austin aser India Defence Minister, Rajnath Singh nata aden.

2+2 ministerial senden nungji Blinken aser Austin na leniba nung America nungi ketdangsertem aser S Jaishankar o Rajnath Singh na leniba nung India nunger ketdangsertem aden.

Senden tenzüka Jaishankar-i, tamalen Ato kilonser Narendra Modi aser US Tir Joe

Biden nati partnership ajungba akümtsü aser alima nung tongtambang onüktem atema longjemer inyaksü jembiba onüktem repringshitsü atema iba senden ya maongka tajung lir, ta metetdaksü.

Blinken-i, Indo-Pacific nung teladak süa inyaksangshitsü aser Quad telok nung US aser India nati longjemer inyakba indang metetdaksü.

Blinken-isa alima nung yimjung aser security atema linük anati ano taliba longjemer inyaksü nungdak, ta jembiba liasü.

India aser US na tsüingda defence tsütsü amalitep tajungba akümtsü ayongzüka Rajnath Singh-i, "Asen linük

ana tsüingda tesendaktep nung tongti tongshi rongnung kaji Defence tsütsü amalitep ya lir," ta shia ano lenla aika nung amalitepa inyaksü melunga lir, ta ashi.

US Defense Secretary Austin-i alima nung tayongzüka onük balala atema democracy linük tulutiba anati (India-US) tebilembatem rongdak süa lemsateptsü nungdak, ta ashi.

Kasa senden nung tongtambang technologies, civil outer space, tongtambang minerals aser Indo-Pacific region nung tayongzüka balala koktettsü atema linük anati maneni amalitepa inyaksü asoshi o lemtepa liasü.

India-i Israel aser Hamas na tsüingda rara anentsü ayongzüker

New Delhi, November 10 (Agencies): Israel aser Hamas tsüingda anogo 30 dak tema raraan arudang India-i maneni telok anaprongla dang rara süngjemtsü, tensa tamajungba mekümdaktsütsü aser ken o jembiba ajanga Palestine ken o bentettsü ayongzüker.

India-isa Hamas telok dang pua alirtem tangsa telatetba kecha makai chioktsü ayongzüker.

Osangbenertem den

jembidang Ministry of External Affairs (MEA) otongdar, Arindam Bagchi-i, Hamas-Israel rara dak sendakba nung India-i October 27 nü UN General Assembly nung metetdaksüba densema India tangatetba aiben metetdaksüogo, ta ashi.

"Onoki Israel amakba sashia aitsüogo, kiralongra khenyongi magizüketttsü nungdak ta shiogo aser tangsa telatetba kecha makai pua alirtem chioktsü takhangba

Mopung menenba shilem 38 bo Punjab nung alu arongba agi lir: Centre

New Delhi, Yimpoksüi/ November 10 (Agencies): Alu nung mopung nung azü/jana arongba shilem 93 bo Punjab nung lir, ta shia cabinet secretary-i Punjab state sorkar dang alu nung azü arongba nokdangtsü atema mera agia inyakang, aser iba atemaji district magistrates, senior SPs aser SHOs nem mapa nunglokjang, ta metetdaksü.

Commission on Air Quality Management (CAQM)-i Punjab aser Harnana na dangi 'flying squads' yoka alu nung azü arongba mita repringdaksütsü aser alu merühzüki tashi parnoki anogo shia sorkar nem report agütsütsü.

Haryana nung alurühba shilem 90 temogo saka Punjab nungbo shilem 60 dang temogo, anungji ano anogo aika alu nung azü rongdoktsüa akok.

Supreme Court tetuyuba nung Bodhbarnü cabinet secretary Rajiv Gauba-i Punjab, Haryana, Uttar Pradesh, Rajasthan, Delhi nungi tongti ketdangsertem aser tongtambang Central ministries nungi ketdangsertem jaoka mopung menenba nokdangtsü atema

asalentong yanglu. Delhi nung mopung menendaktsüba shilem 38 bo Punjab nung alu arongba agi lir, ajisüaka administration-i aluyimertemji menokdangteter.

Union Environment minister Bhupender Yadav-ia Delhi nung mopung kanga menenba atema Punjab nung AAP-i aniba sorkar sashia aitsüogo.

Social media ajanga Yadav-i, taküm September 15 nungi tenzüka alu nung azü/jana arongba tatalokba 24,695 liasü, aser iba nungjagi shilem 93 bo Punjab nung lir, ta metetdaksü.

Paisa, Delhi- NCR ya 'gas takdang' mesüka kümogo, kechiyong AAP sorkari aluyimertem dang tanga lenmang mesayuteter, ta aitsü.

"2018 küm Centre sorkari crop residue management machines (CRM) alitsü atema state sorkar nem sen crore 1,400 agütsüogo. Iba atema senji kechi nung indokar @ArvindKejriwal (Delhi CM) aser @BhagwantMann (Punjab CM) nati langzütsü mapang tongogo," ta Yadav-i metetdaksü.



November 10, 2023 nü Dehradun nung ITBP pur 62buba Foundation Day Parade nung Union Home Minister Amit Shah adenba noksa nung angur.

No more delays in loan processing... Register today with an Account Aggregator. It's easy, saves your time and money!

For more details, visit <https://rbikehtahai.rbi.org.in/aa>
For feedback, write to rbikehtahai@rbi.org.in

Issued in public interest by
भारतीय रिज़र्व बैंक
RESERVE BANK OF INDIA
www.rbi.org.in



TIR YIMYIM YIMOBILEM (EDITORIAL)

DIMAPUR

KÜPTOKNÜ

YIMPOKSÜI 11, 2023

Asenokbo tenüngsener mekümlü

Nagaland nung alir senso ajaki Nagaland meimer saka shingai Nagaland junger tabo mashir, kechiyong tangbo la tereprangtsüa majung aser senponga - jangponga tazüng, anungji sentsütsür. Ibayongji, Naga nung rongnung nüngsen agir mali ajak nüngsen jembir dang kümogo. Iba jagi balaka Nagaland tajungba makümer, kechiyong yanglushitsü atema shisa (idea) tasen bentepa jembitsü melen par teloki raksa, par kin majung aser pa leniba meshitak ta kisüng jembir agi Nagaland sünga lir. Iba jagi Nagaland nung party melenyonga majunger aser nisung melendangsa tamajungba kümadoker. Ibaji pei lima yanglushitsü tebilemba tasen aser tajung bener yimten aser lokti nung shilem agir masü saka tangar majung dang jembia asenoki yimten aser lokti nung shilem agiba ajanga chipo dang melen ashi aonbo kasa dang tamajung asür. Aji oda, asen lima nung nüngsen jembia jembia asen külen aser tangar külen ta kümogo, kechiyong kechisarina ajak nung asen tama aser tangar tesü, anungji tamapurtemi parnok asoshi kecha anünga meyutsüi agiadok amai tesüpurtemi bilemer. Atangji, asenoki inyakba tajung aika liaka ano asenoki inyaksaba aser inyakpetba mapa tamajungtem aika lir. Iba jagi tangari asen nüngsen kanga jembir aser asenoki chitsüba aser jemtsüba agi parnok tangutsü ka mangu timtemer amai bilemer. Ibaji asenoki kodang tangatetba tajung agi bilemdangdir, asen nüngsen jembitsürtem dangji jashitsü melen asenoki asen tashimait aser tamakok tali jangjaa rajemtsü. Ibaji tamapur aser tantsü tambu dak aketba shisatsü aser tangatetba asütsüla. Ajungyonga majungyonga Nagaland nungbo alima sangwa angurtem rongnung asenok tamapur, anungji Nagaland junga mesangwateti timtema lira, ibaji tangar dang atongtsü mali, aji asen tamakok asütsü. Aji oda, asenoki tangarbo tajung küma melenshitsütet saka asenokbo tamajungba küma ao ta asüba agi tangari asen nung asener aser iba nung jagi asenoki mejenpur. Tanü tangari asen tenüng asangtsü melen asenoki aseni tajung inyakba ajak ajembanga tashiyim amshiba, ochimashi inyakba aser temeim mesayutetba mapatem agi nüngsenang tuluka petlokogo. Asenokbo item temenentemji Tsüngrem dang nangzükdi. Atangji, tai nangzükba aser taidok meshiba yabo asen o Tsüngrem na tsüngda, yabo lokti mapa masü, ajsüaka nisung ka anati masü saka kin rangben mejungi akümba aser ajaki mejungi benshiba mapa ka süra, atangji, nübortem ajak adenshir kin rangbeni lumia taidok meshitsü langa lir. Iba tsütsüji dang bilema kodang asenoki nübortem anitsü asoshi tadok aser shisatsü meshia Tsüngrem bushidir, idangji dang asenok anema tangari nüngsen mejembitsüsa Tsüngremi mapa inyaktsü. Ibaji merajemi asenoki tangar majung jembira, asenok atemabo aji asen dak tenükmerem aser mokokaji aliba ajanga jembir asütsü. Atangji, yashi asenok mapang o tanü tangar mapang na tsüngda ano alima ka ittepa lir, kechiyong yashiji tejen putu liasü saka tanübo putu tasenba nung ayaoker küm 23 buba jajar, anungji nisunger shisatsü aser tokolok awajemba nung kenyongi balala. Yashi asenoki cricket pad ka malitet saka tanübo cricket stadium yanglur, yashi asenoki public ground ka meyanglutet saka tanübo Sports city yanglur, yashi asenokbo anarongdena bara kitem yanglua among saka tanübo tourist resorts yanglur. Item mapatem nungji tenükmeremtsü aser tenüng asentsü mali saka tenükshitsüka aser asenoka item ama terenlok mapa tajungtemji ajizüka inyaktsüla. Tanü tamapur agi tesüpur akümbaji tapi agibo masü, asenok tokolok tila aser shisa tatsü, anungji asenoki proxy dak dang amanger aser takaba ajak agi ali tilaka alia ki yanglutsüba mapa dak alema oagi asenok nükla nung mangur. Aji oda, proxy-ji proxy asütsü aser political tashi amshia bushiness inyaktsü merangba nung nübortem jungjunga akoksadakttsü. Joko, asenokbo proxy agi masü shitakba nung telemtetba agidi aser nüngsen jembir masü saka shitakba yimten tangatetba nung nübortem nem lenisüba tajung agütsüba kin aser lenir asütsü merangdi.

OLEMSABANG

Ao lima Arogo tenzükba nung kü tangatetba

Rev. L. Kari Longchar

Khristar Arogo Ao litsü (soil) nung tenzükba otsü nung mangatetep madoktsü asoshi 2022 khen aser 2023 khen ta anaben ABAM dangi ni zülüogo. Ano Ordain Minister tamburtem 16-i ABAM dangi zülüogo. Onok Impuri oa ABAM staff-tem den asemben ajurutepa temepishiba o lemsatepogo. Saka item ajakji parnoki magizük. Iba asoshi nemjemer. Ajiasünung, Ao arogotemi metettsü atema kü tangatetba kar zülur.

OTSÜ: 1871 nung Molungkimong lenirtemi Sibsagar nung Dr.Clark denjia temba yimteter Molungkimong yimsüsürtemi anir timtem tulu agia Dr.Clark aser Godhula par yimtsüng süngkhümi anioka Sibsagar nung November 10, aser Molungkimong nung December 22, temulung meyiper nisung 9, aser 15 baptir December 22, 1872 nung Ao litsü nung Khristar Arogo Molungkimong nung tenzük. Aser iba organized Arogoji October 24, 1876 Molungyimsen yim akümdang bener oadok.

JUBILEE : America Missionary Aolima arua amenokba Golden Jubilee 1926 Impur nung amung. Ano 1897 Molungyimsen nung Ao Mungdang tentetba Golden Jubilee 1947 nung amung. ABAM Centenary aser Molungkimong Centenary 1972 nung amung. Molungyimsen Arogo Centenary 1976 küm amung. 1997 ABAM, Molungkimong Arogo QOC aser Molungyimsen Arogo 125 baptism anniversary amung. ABAM, Molungkimong aser Molungyimsen Sesquicentennial 2022 küm amung.

MANGATETEP ADOKBA: ABAM Golden Jubilee Resolution ajanga mangatetep adok. Iba Resolution-ji yamai: "October 24, 1876 nung tamasa Molungyimsen nung Arogo tenzük. Anungji küm shia Aoli Arogo ajak nung October 24-ji Arogo tenzükba anogo ta amungtsü aser iba anogo nung sarutetba sen ajakji Clark Memorial Fund-i yoktsü".

Tesülen ibaji meshitak ta angateta aru. 1960 küm Research Committee ka shim. Saka kechiba 1947 Resolution melenshir ta Molungyimsen Arogoi ABAM dang mepelai aru. Khensa Mungdang 1963 nung Research Committee-i Ao Arogo tenzükba 1872 December 23, ta bushitetba Mungdangi agizük. Ano 1965 nung mezüng baptiba anogoji Arogo ka tenzükba anogo agitsü ta Mungdangi lemtet. Iba sülen ABAM Special Committee kati Molungyimsen Arogo den ajurutepa tangatetep adok.

Joko Molungkimong aser ABAM Arogo tenzükba 1972 Centenary amungtsü renemtep. Saka Molungkimong Arogoji metangdangi aruba küm 100 mabensa ta shia par Centenary nung ABAMi shilem magi aser lim Arogotema maotsü nongtem. Iba jagi mangatetep tali adok.

Iba sülen Mungdang Special Committee balala ajanga research bushitep aser ano Molungkimong Arogo aser ABAM joint Research Committee ka shima otsü bushitep.

TANGATETEP ADOKBA: Tatembangsa 1981 nung Special Committee kati tebushitetba 1986 Council nung Mungdangi agizük. Parnok report oren kar yamai:

"Dec.23, 1872 yaang Aolima aser Nagaland nung Khristar Arogo tenzükba 1872 asen lima (soil) nung Arogo tenzük.

Molungyimsen Arogo Molungkimong yimdak Dec.23, 1872 nungji tenzük ta angateter. October 24, 1876 yabo yim tasen ka Molungyimsen akümba dang lir.

TANGATETEP NUNG QOC AMUNGBA: 1986 Lemtet ajanga ajaklen tangatetep, teputep aser yimjung adoker QOC Anniversary-bo ABAM, Molungkimong aser Molungyimsen 1997 küm mungogo. Ni ABAM Office nung alidang item ajak nung shilem agiogo. Molungyimsen Arogobo 1947 ABAM Resolution aser 1986 resolution nung ajemdaker 2001 QOC aser 1997 QOC (incognito) anaben amung.

Yamaji 1986 Resolution ajanga ABAMi Arogo anaprongla nung shilem agiba ajanga Mungdang ken o ajak tiptema ozü putu nung tembangogo.

TANGATETEP ASER YIMJUNG BUSHIBA: Mungdang ken o Civil Court-i aoba ajanga Khristan taküm kuli, telungjem aser tesendaktep raksatsür. Christian Principle aser ABAM inyakyim nung shinga maitsüi win win module nung yimjung bushitsü tim.

1. ABAM Procedure: Yimya agi ABAM Central Council nung lemtetbaji Council nung dang jembiteper melenshir. 1986 renemba nung temulung mesüra Council nung agenda benoka jembir melenshitsü akok. Council nung metembangtetra Special Committee ka nem nongloktsür ibaji Council-isa bener arua tembanger.

2. Spiritual Approach: Ao Arogo, Mungdang aser Ao kini Tsüngrem nungi pilaba agi timtem jenti adoker. Anungji Aor yimkongi Tsüngrem bushitsü national repentance, telumiba ka ayongzüksüla. Yamaji ita ishika lumir külen Ao Arogo lenirtem, Tamang tir aser Ainkartem Impur nung nongtenger kukua lumitsü, idangji Tsüngremi Aor den jembitsü, asenok melenshitsü aser Aor tia yanglushitsü Tsüngrem tenangzükba lir.(2Puti 7:14)

ABAM Central Council teinyaktsü, Executive Committee teinyaktsü aser tanga standing committee, special committee duty and function memeyoktepi rateta inyakra tarutsü nungbo Mungdang dangi tebilemba balala arudang melamelaa ken o pentettsü. Anungji 1986 nung lemteta akaba ama Molungkimong Arogo aser Molungyimsen Arogoji 1872 December 22, nung Molungkimong yimdak tenzük ta ni angateter. Tsüngremi Ao Mungdang moajangma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Laishiba nung shin otem asen matsüngdang ataloker: Greg Laurie



Pastor Greg Laurie

November 10, 2023: Kaketzülur aser pastor Greg Laurie-i, tang Middle East nung tatalokbatem ya Laishiba nung shin otem asen matsüngdang tenük agi ngua ataloker ama ni bilemer; Khristantemi Israel pusemba den külemi region nung yimjung atema sarasademtsüsüla, ta ashi.

Harvest Christian Fellowship nung pastor Laurie-i, tang Russia, Iran aser Israel nung tatalokba ajak ya Laishiba nung shinzüka aliba otem ataloker asütsü, ta ashi.

"Tarutsü atema shinba kaketji ibai (Laishiba) lir. Tatembang putu nung kechisa ataloktsüar Laishiba ajanga asenok dang ashir. Medemertem, asenoki asen nük agi itemji atalokba ngudar," ta pai pa indang social media accounts ajanga lemsatop.

Shin otem indangji 1948 küm Israel linük tentetba mapang nungi tenzük, ta pai ashi.

"Laishiba ajanga ashiba agi,

Yihuda nungertemji Tsüngremi shimtetba nüburttem. Parnok alima kinük pezü nung prokshitsü. Laishiba ajangasa Yihuda nungertemji tanaben adenshitsu shia lir. May 14, 1948 anogo nung Laishiba nung shinzüka aliba atalokba asen tenük agi nguogo," ta pai metetdaksü.

Paisa, Ezekiel tapu 37-38 nung north tsütsülen nungi Israel tsükchirtem adenshia temeshi lima amaksü indang shia lir aser tsükchirtem rongnung kaji "Gog aser Magog," lir; Laishiba tsütsü mongintem aikati iba ya Russia linük tetshiba lir ta bilemer, ta ashi.

"Ni ocet ka nung yamai züngshiogo, Russia-i senotsü agi yariba army- Wagner Group-i Hezbollah telok yaria raraba 'anti-aircraft' hadirtem agütsür," ta pai ashi.

Hezbollah ya Israel kidanger Lebanon nung kiralongrar aser yimtenren party ka lir.

"Ezekiel tapu 38 nungsa

Magog-i la (Israel) amaksü indang shia lir aser Magog pusemer rongnung kaji Persia lir. 1935 küm Persia nungja 'Iran' ta melenogo. Hamas, Hezbollah aser Iran-i odiodia parnoki Israel samatsüner ta jembio," ta paisa metetdaksü.

"Magog ji Russia asütsüa akok aser parnoki Persia (Iran) den senteper parnok amaksü. Laishiba ajangasa Tsüngremi item sepaiteimbaka samatsütsü aser Pa tanela Israel nung madak alitsü indang shia lir. Anungji Yihuda nung atema tanela asentenshi tuluka arudar," ta pai ashi.

Laurie-isa, Khristantemi Yirusalem nung yimjung atema sarasademtsüsüla aser iba region nung tatalokbatem angatetsü merangtsüsüla, ta ayongzüik.

Paisa, tang alima tesem balala nung Yihuda nung sempaba kanga bulua kümogo, ta ashi.

"Khristantem ama asenoki Laishiba angatetsüsüla. Laishiba ajanga Yihuda nungertemji Tsüngremi shimtetba nüburttem ta ashir. Khristan ka ama asenoki Palestine li Yihuda nung, Israel nung nem agütsüba angatetsüsüla. Iba limaji Tsüngremi parnok (Yihuda) nem agütsüba lir. Asenoki parnok atema sarasademtsüsüla, kechiyong Tsüngremi asenok nem Laishiba ya Yihuda nungertem ajanga asütsü. Tsüngremi asenok nem Messiah ya Yihuda nung ka ama agütsü," ta pastor Greg Laurie-isa metetdaksü.

ANOGO ABEN TSÜNGREM DEN

Temeshi Kibuba Benjung

1 Korint 11: 17-34

Asenok mapang kintem tebilemba lemsatopba agi alimaji akümer ta asenoki metetta lir. Arogo shia osangtsüsang kaket nung kintem rongnung loktiliba, yimten nung aser rongsen ketsüng nung tatsütepba aliba asenoki azünger aser metetter. Saka item ajakji bushidangra alimaji tai masü, kija tai agi item ajak adoker. Idakji Khristan yimsüji tatembang tongtipang akümer kechiaser iba yimsü nükjidongji kija kümzüksüba nükjidong lir. Aji oda, Kibuba benjungji kija nungdak taroktiba nung tenzüksü atema alir.

Kija taküm Tsüngrem nungi pila lira shidakba tangatetba nung kija taküm jagi nükjidong matong. Shibai amanger saka pa/la Tsüngrem nungi pila alir ta shibai bilemer pa/la nem Kibuba benjungji agütsür. Shilem agirtem nem teti Kibuba Khrista O tem bilemtetdaksüsüla. Iba marok kü azü tasen tezüngzüktepba lir. Kibuba benjungji Khristantem tamang nungi adokba taochi tezüngzüktepba Tsüngrem ajanga agütsüba lir.

Anungji shilem agiba jagi Tsüngrem temeim aser tatok agütsüba bilemtetdaksür aser kija taküm agizükba tangatetbaji renlokdaaksür.

Itemi shisadangang: Ne lima raksaa lir asü? Na-a raksa lir ta nai bilemer asü? Na anebsütsü asoshi Khrista raksa ta bilemtetang. "Pa azükba agi na anepa lir ta bilemtetang". Ne tanelaren alangzükba aser aneptsüba asoshi Tsüngrem tenung sangang.

Indonesia nung Arogoi ochimashi tenla meyipa agütsütsü

November 10, 2023: Indonesia linük nung Khristan lenirtemi taoba mapang minister, Johnny Gerard Plate-i Arogo nem agütsüba tenla meyipa agütsütsü telemtetba agiogo.

Sen million aika dak sendakba Telecom ochimashi ken o nung Johnny Gerard Plate aija jail nung puokba sülen Arogoi iba telemtetba ya agiogo.

Arrshi küm 67, Plate ya businessman ka liasü saka pai yimtenren nung ajemok. Pa Indonesia nung Communications & Information Technology Minister inyakba mapang nung linük senpong nungi rupiah sen trillion 8 (US dollar million 537) takoksa ngua liasü.

Infrastructure, talisa Base Transceiver Station [BTS] 4G project inyakba mapang nung ochimashi mapa tulu inyaka liasü.

Taküm May 17 nü Attorney General's Office ajanga pa apuba sülen Tir Joko Widodo administration-i pa menden nungi anentsüogo.

November 8, 2023 nü Corruption Crimes Court-i pa küm 15 jail nung puoktsü

obendang agütsüba den külemi senchi rupiah sen billion ka achi aser linük senpong nungi sen billion 15.5 takoksa anguba atema temenok agüjang ta tuyu.

Kasa ken o dak sendakba nung Telecommunications & Informatics Accessibility Agency director, Anang Achmad Latif küm 18 tepuokdak ayutsü aser project consultant, Yohan Suryanto küm 5 tepuokdak ayutsü obendang agütsü.

Court-i ashiba agi, ochimashi rongsenji shilem karbo Arogo aser Arogo meyong rejutem nem tenla agüja liasü; Widya Mandira Catholic University nem sen million 500 agütsü; East Flores Regency nung tzümetsüng lendong ajanga kongshirtem nem sen million 200 agütsü aser Timor Evangelical Christian Church nem sen million 250 tenla agüja liasü.

Timor Evangelical Christian Church ya Kupang nung Protestant telok ka lir. Kupang Arogo nung senyur, putir Ambros Ladjar-i, Arogoi ochimashi tenlaji meyipa agütsütsü, ta metetdaksü.

Pai ashiba agi, ochimashi ken o nung Plate dak melung malem tenzükba sülen prosecutor's



Indonesia nung taoba mapang minister, Johnny Gerard Plate aser Indonesia Tir, Joko Widodo na tamalen tangokba noksa nung angur.

office ajanga pa danga Arogo nem tenla agütsüba dak sendakba tasüngdangbatem asüngdanga liasü.

Arnoldus Catholic Education Foundation nung Chairman aser Widya Mandira Catholic University ketdangtsüa reprangsang, putir Yulius Yasinto-ia, ochimashi tenlaji meyipa agütsütsü pai melunga lir, ta metetdaksüogo.

Pa danga prosecutor's office ajanga asüngdangyaa liasü.

Putir, Yasinto-i, tarutsü nung sorkar ketdangsertem ket nungi tenla agizükdang asenoki kanga kumdangtsüsüla; iba ken o ya

asenok atema tangzüksü aketba ken o ka lir, ta ashi.

2022 küm Plate-i Widya Mandira Catholic University semdanga o jembiba sülen pai shilem aika lemsar university nem tenla agüja liasü, ta Yasinto-i ashi.

"Tensaji onoki maziüoktet. Ajungbena onok ajak lia tenlaji agütsü. Iba tenla nungji tashishitsü keta ali asü maliar reprangshitsü atema mapang maliasü," ta paisa ashi.

Indonesia nung Base Transceiver Station 4G project ji East Nusa Tenggara aser Papua province na nung

internet agütsütsü atema liasü, ajisüaka tower aika mapa meinyakba ajanga iba project ji anenadok. Iba project nung rupiah sen trillion 10 shi indoka liasü.

Plate ya Arogoi lapokba Pius XII Minor Seminary nung aziung aser pai Khristan telok aika nung shilem agiba den külemi Arogo aser Arogoi ketdangtsüba rejutem nem mapang shia tenla tulu agütsü.

Linük Tir, Joko Widodo indang administration nung ochimashi dak sendakba nung Plate densema minister 5 jail nung puokogo.

**AO OSHI ANGAZÜKDAK:
TANÜ ANGAZÜKTSÜBA OJANG**



Tir Yimyim

Semchisemnur

(n) tsüraburtem nungi jakzüka aoba tanurtem (grand and great grand children)
* Semchisemnurtem dang pei oshi sayutsüla.

Semdang

(v) ajurua ao (visit)
* Ozü medemeri ni shiranga alidang semdang.

OLONG PAITEP # 6692

1	2	3	4	5	6	7	8
9							
10						11	
				12			
13	14		15			16	17
						18	
19					20	21	
			22	23			
24						25	26
	27				28		

TIPIEN

- 1. Makora (6)
- 7. ___ ai (3)
- 9. Mesakteti akümba (8)
- 10. Aroki (6)
- 11. Nü nung inokba süng (3)
- 12. Tebu senmang ayoksang (4)
- 13. Ola tatok/tasaden ta ashiba (6)
- 16. Italy yimtiba (3)
- 19. Pa meyong küma (4)
- 20. Yim anasa aliba tesem (5)
- 22. Tuoshi (6)
- 24. Densema (5)
- 25. Kechi amala ta asüngdangba (4)
- 27. Atakatem ato (3)
- 28. Kü indang asütsü ta küma ayuba (5)

LANGTSÜNGLEN

- 1. Tenung maja (5)
- 2. Sungdong ali nung enok (___ m) (3)
- 3. Aika (5)
- 4. Nedi tebutsu dang ajar (3)
- 5. Semer anasu (5)
- 6. Suoshi junga masem (5)
- 7. Temalen nungi marur (5)
- 8. Ojang dang (5)
- 14. Süngdong nungi agizük (5)
- 15. Ajak osepogo ta ashiba (6)
- 17. Aotsu mela (6)
- 18. Su agi meyibanga (5)
- 20. Araktsu amshiba tapu ka (2)
- 21. Tangar masü (4)
- 23. Mezung zungya (2)
- 26. Memerüker temang nung aliba (2)

OLONG PAITEP # 6691 TELANGZÜBA

TIPIEN:

- 1. Tesangra, 5. Mungo, 7. Kisen,
- 8. Salem, 12. Semki, 14. Kilem,
- 15. Kensü, 16. Sangpang.

LANGTSÜNGLEN:

- 1. Temesen, 2. Raksa, 3. Aon,
- 4. Aso, 6. Nile, 9. Alizüng, 10. Omen,
- 11. Lemta, 13. Ola, 14. Kin.

NAI-A YA METETTER MA



Roman nungertemibo natzü agisa tepo merük-merüka meyu ta otsüi ashir. Atangji ibaji shitak liasü kechiaser natzü agi meyuba sülen tepoji mesüng-mesünga aküm. Aji oda süaka, nungni, naibo yamaji teinyak.



East Jaintia Hills district nung aliba Star Cement Plant, Lumshnong nung Rs 4 crore alang narcotic drugs and psychotropic substances raksa endoktsüba jakdang agiba noksa angur. Star Cement Plant nung aliba furnace rongdokba ya ken o 51 nung apuba mozütem liasü ta Meghalaya DGP LR Bishnoi-i ashi.

AIUDF-i Assam Lok Sabha menden 3 nung tokteptsü

Guwahati, November 10, 2023 (Agencies): Badruddin Ajmal lenisüba kübok All India United Democratic Front (AIUDF)-i Lok Sabha menden 14 nungi 3 nung tokteptsü osang metetdaksüogo.

2024 elections nung parnoki menden 3 nung tokteptsü ta AIUDF MLA Rafiqul Islam-i ashi.

AIUDF-i Dhubri, Karimganj aser Nagaon Lok Sabha constituency tem nung tokteptsü.

"Tesüiba nung AIUDF-i Karimganj menden nungi takok angu aser Badruddin Ajmal-i

tang Dhubri Lok Sabha constituency nungi MP inyaker. Taruba election nung onoki Nagaon Lok Sabha menden nung takok angutsü atema meranger" ta Islam-i ashi.

"AIUDF-i nüboyimba sentong tenzüksü renemogo aser Bharatiya Janata Party (BJP) anema tokteptsü. Onok ket nung vote bank tajung lir aser tanünga Lok Sabha menden 11 nunga onok pusemertemi BJP nem vote meinoktsütsü" ta pai metetdaksü.

Congress-i anir political party 12 ajanga tentetba United Opposition Forum atema

jembidang "Parnok telongjem mali. INDIA nung AIUDF adentsü mejaok" ta Islam-i ashi.

Taoba mapang AIUDF tanishisang Badruddin Ajmal-i INDIA bloc pusema nungittsü shia iasü aser iba ajanga Centre nung taruba sorkar nung parnoki tongti shilem agitsü akok ta sayur.

2019 Lok Sabha election nung AIUDF-i Assam nung menden ka nung dang takok ngua liasü. 2014 küm parnoki Karimganj aser Barpeta nung takok angu aser 2019 nunga kasa menden nung toktep saka tamakok angu.

Centre-i Arunachal nung hydro power project tulutiba yanglutsü mulunger

Itanagar, November 10, 2023 (Agencies): Arunachal Pradesh nung Rs 40,000 crore shi endoka hydro projects 2 inyaksü atema Central Electricity Authority (CEA)-i detailed project reports (DPRs) agizükogo.

"Etalin hydroelectric power (HEP) ji 3,097 MW aser Attunli HEP ji 680 MW asütsü" ta Hydroelectric power generation company SJVN-i ashi.

"Central Electricity Authority (CEA), Ministry of Power ajanga Company nem 3,097 MW Etalin HEP aser 680 MW Attunli HEP indang DPRs agütsüogo" ta SJVN-isa ashi.

Etalin HEP indang mapatongji March 2022 price level nung Rs 32,813 crore lir aser Attunli HEP atema Rs 6,866 crore lir ta parnokisa ashi.

Linük nung hydro project tulutibaji 3,097 MW Etalin HEP ya lir.

SJVN company aser Arunachal Pradesh sorkar tsüngda August 2023 nung hydro power projects 5 inyaksü atema Memorandum of Agreement (MoA) nung sign sütepogo.

Mapa tembangba sülen Etalin HEP ajanga electricity 12,752 Million Units aser Etalin HEP ajanga 2,814 Million Units agütsütsü. Iba mapatong ana indang leveled tariff ji Rs 4.51 per unit asütsü.

Manipur CM-i permanent housing scheme tenzüksü



Imphal, November 10, 2023 (Agencies): Manipur Chief Minister N Biren Singh-i Permanent Housing Scheme ka tenzüksüogo. Iba ya kin o kin mepetmesü ajanga pei talidak toktsür aoertem asoshi lir.

Chief minister Biren-i iba scheme kübok Imphal East, Kakching aser Bishnupur District tem nung beneficiary nem senotsü agütsü.

Iba scheme kübok pucca house atema Rs 10 lakh, semi-

pucca atema Rs 7 lakh aser kutchu house atema Rs 5 lakh agütsür aser Manipur nung nisung 4,800 tema nem iba teyari agütsütsü. Beneficiaries-i pei pei Deputy Commissioner nem mapa inyakba noksa sayuba sülen tanabuba installment agizüktsü akok.

"May 3, 2023 nungi mepetmesü adokba ajanga takoksa ajurur nem sorkari teyari agüja arur aser iba atema Rs 399.82 lezmüktsü" ta CM N

Biren Singh-i ashi.

Iba nung Manipur IT Centre for Exams atema Rs 11 crore, relief camps nung TV sets atema Rs 4.5 crore, prefabricated houses atema Rs 150 crore, ita 6 relief camp management atema Rs 101 crore aser nutrition & winter preparedness atema Rs 89.22 crore dena lir, ta Biren Singh-i ashi.

Relief camps nung alirtem asoshi 2nd round atema Rs 1,000 agütsüogo. Ano labor card holders nem tanur shia shisaliok atema Rs 5,000 agütsüogo. Sorkari asükwa aruba agi yipden anepalutsür ta paisa ashi.

Ki rongdoktsür mesüra raksatsürtem pei pei Deputy Commissioner (DC) Office temi orr senotsü teyari atema tenüng agütsütsü ayongzüker ta CM Biren-isa metetdaksü.

Myanmar paksatsü akok: Mitkar yimsüsür

Naypyidaw, Yimpoksüi/Nov. 10 (Agencies): China den arütsü anasa tawa rara tenzükba junga ketdang mesütetba mechi linük paksatsü akok, ta Myanmar nung mitkar yimsüsüba kübok linük tiri ashi.

Myanmar mitkar temi 2021 küm tashiyim amshia sorkar atsüngdokba sülen tang par tashi atidangba mapang lir. Democracy bhukumba telungpur aser ethnic minority telok temi linük north, northeast, northwest aser southeast tsütsü mitkartem amenoka aliba tesentem amaker.

National defence and security council senden ka amendang, sorkari tang arütsülen tensa junga ketdang süa mazüoktetra linük shilem aika kuma lemsatsüsa akumtsü, ta State Administration Council indang Tir Myint Swe-i khuret lemsatepa liasü.

"Iba tensa kanga kumdanga azüoktsü nüngdaker. Linük asoshi ibai tongtipang mapang lir, nübür ajungai Tatmadaw yaritsüla," ta pai ashi.

Linük lungjemdaksütsü tashi onok dak dang lir, ta küm aika mitkartemi jembia aru. Iba tebilemba nung sorkar amokbanga aser opposition ajemrepa arur.

Myanmar nung 2021 küm mitkar tashi amshia sorkar atsüngdokba sülen tesunep makai arur, kong mitkar temi election ajanga shimba Aung San Suu Kyi'er sorkar atsüngdoka liasü. Mitkar temi kanga sashia yimsü süa aruba sülen küm ter shi temelenshi nung aruba yangji tembanga liasü.

Tesüiba anogo ishika tsüngta telungpur telok kar lungjemer China den arütsü anasa shishilempaba jila

amokbanga item tesem nung mitkar tem tashi sama.

Tang Myanmar nung rara adoka arütsü alema aita khatetpa mapang China nungera süogo, ta China-i tan hopta sangdonga liasü.

Chinese foreign ministry ajanga Brehostibarnü (November 9) sangdong ka nung par nübürtem dang rara adoka aliba tesem leni maotsü aser Myanmar-i maotsü ajungshia liasü.

Chinese Ministry ajanga ashiba agi, rara adoka aliba tesem nung alir China nunger temi tensa kanga junga repringtsüla aser pei kumzuka alitsü asoshi nüngdakba mera agia nüngdakra linüki meyipa arutsüla.

Myanmar rongsenketzüng nung China shilem tulu lir aser parnoki iba linük indang rongsenketzüng nunga temolung kanga agütsür.

Assistant Chinese foreign minister Nong Rong-i tawa Myanmar semdangba mapang arütsü nung tensa azüoktsü mechi China den lungjemer inyaksü ajungshia liasü. Kasa mapang pai China nunger tejangraba wazüka ayutsü asoshi mera agütsü mepishi.

Maneni United Nations-ia sangdong ka nung, Myanmar nung mitkar yimsüsür aser telungpur tsüngta raraba ajanga nisung 90,000 shi pei ki yutsür tesem balala nung jenoka lir, ta ashi.

"November 9 tashinung northern Shan nung aliba nisung 50,000 jungnüa pei ki yutsür tesem balalai aotsüsa akum," ta United Nations Office for the Coordination of Humanitarian Affairs (OCHA) ajanga Hokulbarnü ashi.

Ano November ita tetenzüklen anasa Sagaing

region aser Kachin state nung mitkar aser parnok anemer tsüngta raraba ajanga nisung 40,000 pei ki yutsür ajen, ta OCHA-isa ashi.

Hopta ana tejakdang Myanmar nung ethnic armed alliances tashi tulutiba, Three Brotherhood Alliance ajanga anüdoklen China den arütsü anasa aliba Shan state north tsütsü mitkar outpost ter dak tema maka arütsü nung aliba Chin Shwe Haw jila amokbanga liasü.

Iba ya 2021 küm February ita Aung San Suu Kyi'er sorkar atsüngdoker mitkartem tashi tendangba tesashitiba liasü.

Three Brotherhood Alliance ajanga sangdong ka nung parnoki Myanmar mitkar temi par litsü rakzüksü merangba nokdang, 'military dictatorship' samatsütsü aser arütsülen online nung ashikülak mapa inyakba samatsütsü meraner ta ashi.

October 26 nü rara tenzükba sülen pei ki yutsür jena aor nisung ajak tamangba yimsü balala indang ki nung jenoktsü meranger, ta OCHA ajanga ashi. Nisung kar internally displaced persons (IDP) tesentem nung lir.

S e n z ü s e m p o n g b a , osangtsüsang agitepba aser danga services nung timtem agütsüba ajanga rara nung nübürtem nem teyari agütsüba maparen nung tetsükdaksü ajurur, ta UN body ajanga ashi.

"Tang rara adoka aliba den külemi checkpoints aser lenmangtem shibangba, apu raksatsüba ajanga humanitarian agency temi timtem ajurua aliba nübürtem metongteter, nüngdakbatem mejangjateter aser tongtipang osettsüset mebelenteter," ta OCHA-i ashi.

Mexico ketdangsürtemi gari tulu ka nung migrants 123 ngutet



Mexico City, Yimpoksüi/Nov. 10 (Agencies): Kidanger linüktem nungi ariba migrant 123 tashi San Luis Potosi state nung trailer ka nung aliba Mexico ketdangsür temi ngutet.

Parnok rongnung tanur 34 dena lir, ta Mexico immigration agency ajanga ashi.

Mexico City nungi mile 372 pilar Matehuala nung ngutetba migrant tem ya timba Guatemala, Nicaragua aser Honduras nungi lir.

Ketdangsürtemi migrants

tem ya koloni oyaa liasüar mashi saka nisung aikati United States atongtsü teimla nung aor.

Shibanga aliba trailer box ka nungi ajepba ola yangji alirtemi angashiba sülen arnok ya ngutet aser parnok nem chiyongtsü aser mozü agütsüogo, ta Mexico indang National Migration Institute (INM) ajanga ashi.

Tensa mebentet tashi parnok anenzüka alitsü tesem agüja lir ta ashir.

Yangji nguteter karbo El Salvador, Ecuador aser Cuba nungi liasü.

Southern Mexico nungi migrant 7,000 shi United States leni aortem rongnung item ya dena alitsü südi ta bilemer. Parnok ya timba Central aser South America nungi lir.

Iba lenmang nung jajar ya timba mapa tamajung inyakba telok dak metaloka lir aser parnok ya pua bener aor mesüra parnok dang senotsü meshir.

Taruba küm election agütsü lia US Tir Joe Biden-i migrant tem amshiba, talisa US-Mexico arütsü nung tensa majungba atema Republicans temi kanga sashia aitsür.

Taoba küm October ita nungi tenzuka tang tashinung US ketdangsürtemi US-Mexico arütsü nung migrants million 2.2 dak tema pua lir.

New York ama yimitem nung migrants tali akumba ajanga tir asoshi tayongzükba tulu lir, shibai arütsü junga ketdang masüba atema aija arur.

MULUNGNEN O



ASUR IMLIMEREN
12/11/1939 – 30/10/2023

Onok ajak asoshi akümdong Tsürabur **ASÜR IMLIMEREN (Chuchuyimlang)** ali wadang tembanger pilaba mapang kiyongertem, telok balala, Arogopurtem, tembartem aser temeimertem-i onok mangyim jashi nung alidang azüngmeyaka medoktsüi onok mulung süneptsüogo ni! Nenok mapa tajungtem onok mulungjang nung teti ayutsü. Tajung Tsüngremi nenok maneni moajangma.

Temeim Kinungtsü, Jabasotem, Kinungtsürtem, Semchir aser Kinungertem.

LAND FOR SALE

Behind Sovima Cricket Stadium

CONTACT
8974020568

RATE Rs. 490/- per Sq.ft.
ANY SIZE AVAILABLE
- Price Negotiable -



BIMA LOKPAL DAY

11th November

Insurance dak sendakba timtem balala angati bentettsü asoshi Insurance Ombudsman ya grievance redressal platform ka lir.

- ☆ Mezüngbuba nung nü indang grievance bener nü indang Insurance Company/Insurance Broker dangi oang.
- ☆ Yangji temolung mesüra jurisdiction den apet Office of Insurance Ombudsman den tongtepratepang.
- ☆ Tang Insurance Ombudsman Offices ya Ahmedabad, Bengaluru, Bhopal, Bhubaneswar, Chandigarh, Chennai, Delhi, Guwahati, Hyderabad, Jaipur, Ernakulam, Kolkata, Lucknow, Mumbai, Noida, Patna, Pune nung lir.

Nai nü indang grievance ya online nung onok indang website www.cioins.co.in ajanga register sütettsü.

Osang tali metettsü asoshi onok indang website www.cioins.co.in semdangang.

QR Code



जीवन सेवा अनेक्स, तीसरी मंजील, एस.व्ही.रोड, सांताक्रुज(प.), मुंबई 400 054.
Jeevan Seva Annexe, 3rd Floor, S. V. Road, Santacruz (W), Mumbai - 400 054.

This advertisement is issued in public interest.

CBC 15227/12/0005/2324

Alima nung molumi lira aji northern Gaza ya asütsü: UN

Tehran, Yimpoksüi/Nov. 10 (Agencies): Egypt nungi Rafah crossing alema Gaza-i teyari oset bener aiba nung timtem kar lir, ta UN Office for the Coordination of Humanitarian Affairs (OCHA) ajanga ashir.

Iba tesem ya gari atema masü saka tetsüng agi senzürtem atema yanglua lir, ta ashi.

Bodhbarnü Egypt nungi chiyongtsü, mozü, mürekmejuba oset aser tzü abenba gari tulu 65 aser ambulance tenet dang Gaza-i ai saka itemji kata northern Gaza matong, ta

OCHA ajanga ashir.

"Tang onoki north tsütsüi gari kati anir moteter, koba kanga tezüdangtsü lir, kechiaser north nung nisung meyrirjang aika lir ta asenoki meteta lir," ta OCHA odongtar Jens Laerke-i ashi.

"Tanü alima nung molumi lira, ibaji northern Gaza ya alitsü. Yangji anüngdanga tetsübotsü aser amjang nunga tetsübotsü lir aser iba amala tensa nung nai ner tanur dang kechi ashitsü. Anünglen mi angubaji nenok tepsettsüba arur ta tanurtem dang ashitsü asü?" ta pai ashi.

(Maneni tapak 8 nung...)

Dr. Imkongliba Ao Memorial Volleyball trophy ayonger

Dimapur, Yimpoksüi/Nov. 10 (TYO): Japukong Youth Organisation (JYO) ajanga ayongzükba 4 buba Dr. Imkongliba Ao Memorial Volleyball Trophy (anüngdang aser aonung asayaba) sentong November 22-24, 2023 anogotem DDSC Stadium, Dimapur nung asayatsü.

Iba asayamung nung Chief Host ya Minister, Higher Education & Tourism, Government of Nagaland,

Temjen Imna Along asütsü, ta JYO tir Limayanger Imchen-i sangdong ka ajanga ashi.

Iba asayamung nung shilem agitsü jangra aliba team temi November 20, 2023 anogo tashinung registration fees sen 8000 agi tenüing zülüoktsü akok. Iba atema form ya Kiran Sports, Dimapur aser Capital Counter, Mokokchung nung angutsü.

Iba asayamung nung takok angur nem senpet sen 1,50,000 agütsütsü, tanabuba jenjang

angur nem senpet sen 80,000 aser tasembuba jenjang angur nem senpet sen 40,000 agütsütsü.

Maneni Player of the Tournament, Best Spiker aser Best Setter nem senpet sen 10,000 agütsütsü, ta sangdong ajanga ashi.

Iba asayamung dak sendakba nung osang tejangja metettsü asoshi mobile numbers 7005414901/8132915385 nung tongteprateptsü akok.

Nagaland indang taoba... (Tapak 2 nungi...)

Pa Nagaland nung Angh inyakdang school ajak nung library lidaktsütsü mechi pai kaket reju aika nem library nung ayutsü kaket agüja liasü. Pai teti kaketshirtem dang pei tesayur akumtsübotsü aser akok tashi kaket meranga azüngtsü ajungshia liasü.

Pa asüba ya linük asoshi aser Naga nung asoshi takoksa tulu alitsü, shiba Nagaland nung nüburtemi tesakloktiba Angh ka liasü.

Pa maliba kanga jangja metettsü. Asen den pa meliaka pai mapa tajung inyaka yutsüba teti asen den alitsü aser asen molungjang nung alitsü.

Nagaland sorkar aser ozü kibong tenüing nung mangyimer kibong den asükhü lemsateper. Asür tanüla teti tatem maka tesunep nung anisüngzükjangma, ta Nagaland CM-i ashi.

Nagaland indang taoba Angh, PB Acharya ajungbena asüba osang angazüka kanga jashir aser mangyimer kibong den asükhü lemsateper, ta taoba NLA Speaker Thenucho Tunyi-i sangdong ka nung ashi.

Asür Acharya dak ajemaluba aser dangar puadaktsüba sempet tajung liasü aser lokti asoshi bendanga agütsür inyakba nisung ka liasü, shibai nübur ajungtsü mechi mapa jenti inyaka aru, ta ashi.

Pa dak tesüngjem yimya aliba ajanga ajaki pa den temolung sadoka jembitet aser

nüngdakba mapang pai teti yaria liasü. Pa ketdangsür tajung ka liasü aser pa nem nungloktsüba maparen tematiba jenjang nung inyak, ta Tunyi ajanga ashi.

Bombay (Mumbai) nung 1977 küm nungi ni pa den metettepa liasü. Iba mapang pa onok azüngba college, Government Law College, Churchgate nung süngo ayokba stall ka lapoka liasü aser ano New Law College, Matunga nunga ka lapoka liasü.

Iba mapang nungi pai ajak den tejungtepnü aser teyaritepnü liasü. Iba sülen pa Nagaland Angh inyakdang aiben tongtipang ken o jembitepa aru, ta Tunyi sangdong ajanga ashi.

Pa asüba ya asenok asoshi ketdangsür tajung aser bendanga agütsür inyakba social worker ka samaba lir. Pa tanüla tesunep nung anisüngzükjangma, ta sangdong ajanga ashi.

Padmanabha Balakrishna Acharya ya October 8, 1931 nung aso aser November 10, 2023 nung asü. Pa ya Manipur indang Angh ama June 27, 2019 nungi July 23, 2019 tashi inyak aser Nagaland Angh ama July 19, 2014 nungi July 31, 2019 tashi inyaka liasü. Kasa mapang pa Arunachal Pradesh indang Angh ama January 28, 2017 nungi October 3, 2017 tashi inyak aser Tripura Angh ama July 21, 2014 nungi May 19, 2015 tashi inyaka liasü.

Tanur sor ita trok sülen Naomi Osaka-i tennis asayatsü

Brisbane, Yimpoksüi/Nov. 10 (Agencies): Taoba mapang World No. 1 nung alila Naomi Osaka tanur sor ita trok sülen Brisbane International tennis asayamung nung shilem agitsü.

Japan tsür pezüben Grand Slam koker alilai January ita la mashisa aliba sangdonga liasü aser July ita jala Shai aso.

Arishi küm 26 tain Osaka-i 2022 küm September ita Tokyo nung Pan Pacific Open asayaba sülen WTA Tour kata nunga masayai liasü.

"Ni court nung arua dangar den tokteptsü kanga yongyar," ta Osaka-i ashi.

"Ni teti kü season Brisbane nungi tenzüknür aser meyipa shilangtsü matateter. Brisbane International ya asayamung

tajung lir."

Brisbane asayamung ya December 31 nung tenzüoktsü aser January 7 tashi asayatsü, koba January 14 nungi tenzüoktsü aliba Australian Open atema tongtipang asayamung ka amai lir.

Osaka-i Grand Slams pezü akokba ronungnung tatemsaba akokba ya 2021 küm Australian Open liasü, koba Melbourne Park nung la asoshi title tanabuba liasü.

2021 küm May ita French Open asayamung nungi anenba sülen lai mezüngbuba major title 2018 küm US Open akokba sülen mapang talangka 'depression' den rara aru ta ashi.

La mental health nung temolung agütsütsü mechi taoba

mapanga asayamung nung shilem magi anisüngzüka liasü aser iba tebilemstü lai yimjak nung jembia aru.

Brisbane International ayonger temisa Great Britain nungi Andy Murray asayatsü sangdongogo, shiba COVID-19 pandemic ajanga küm asem tashi asayamung balala nung shilem magi lia aru.

"Brisbane International tanaben angutsü jangratemtsü lir aser taküm summer nung Queensland-i meyipa aotsü yongya atar," ta taoba world number one Murray-i ashi.

"2012 aser 2013 küm iba iba asayamung akokba bilemteter aser Brisbane nung iba asayamung takok marok tasemben ajungketner."

Alima nung molumi lira aji northern... (Tapak 7 nungi...)

Israel-i tashiyim tali amshiba ajanga Gaza nung rara ulushia akumtsü tejangja ta Iran indang foreign minister-i ashi.

Hossein Amirabdollahian-i Qatari foreign minister Sheikh Mohammed bin Abdulrahman bin Jassim Al Thani den phone ajanga jembidang iba o ya ashi.

"Gaza nung civilian alidak rara ulushia aoba mechi iba rara tuluba akumtsü nükla tejangja kumogo," ta Amirabdollahian-i ashi.

Rara ulua akumtsü tejangja ta pai ashiba tetetzü kechiar mejangja.

"Tel Aviv-i mapa tamajung maneni inyaktsü mapang kanga kera agimatar," ta paisa X account nung Brehostibarnü zülutsü.

"Netanyahu asoshi tajangzükji pai Israel yimli taila tamendak dak tali anokshitsü aser mapa tamajung, azüdokshi aser Zionist yimli tashiyim tejak tali tejangjaba sayua Gaza nung tetsür aser tanurtem samatsür," ta pai ashi.

"Tarutsü tia Palestine meyong aser yangji tarendaktsü mali," ta Amirabdollahian-i zülü.

Iran-i yariba Hamas telok, kobai Gaza nung yimsü asür, parnoki October 7 nü arütsü alema aita Israel amakba sülen region nung tensa mejungi

akum.

Israel aser Hamas den sendaktepa aliba Lebanon indang Hezbollah armed group tsüngta raratepa arur. Hezbollah fighters 60 dak tema aser civilian ter tepsetogo, ta Lebanese security ketdangsür temi ashi. Iba azüdokshi nung Israel sepa tenet aser civilian ka asü.

Israel-i Gaza nung bomb poklokja amakba ajanga tensa tamajungba kuma Iraq aser Syria nung Iran-i yariba sepaitem United States aser coalition sepaitem dak 40 ben dak tema makogo. US sepa 45 yirua lir.

Yemen nung Iran den sendaktepa aliba Houthi movement-ia October 7 nungi tenzüka Israel nung missile aser drone amshia amaker aser item ajak khazüka yok mesüra nükjidong matongdang tsük.

Region nung tsükchir dang tashi sayutsü asoshi mera agir südi ta alimai ajitetba sentong ka nung taoba hopta US-i Middle East nung nuclear amshitetba submarine yokba sangdonga liasü.

Israel nung tanks temi al-Rantisi Hospital, al-Nasr Hospital, Government Eyes Hospital aser Mental Health Hospital tem tesem ajungalen

nungi lungbanga lir, ta Gaza nung aliba Ministry of Health ajanga ashi.

Yangji school aser nisung aliba ki densema lir.

Item mozüki nung shiranger, medical staff aser pei ki yutsür arua jenokba nisung meyrirjang aika lir aser parnok tajemtsü tzü mesüra chiyongtsü maka, ta ministry ajanga ashi.

Gaza north tsütsü Israel nung tanks temi lungbanga aliba al-Rantisi Pediatric Hospital ya US nung aliba Palestinian Children's Relief Fund ajanga yarir aser Gaza nung cancer aliba tanurtem anepaluba medical facility ya dang lir.

Totzü maliba ajanga iba mozüki nung shiranger anepaluba anenogo, ta yangji aliba health ketdangsür temi Brehostibarnü ashi, kong Palestine nung tila-tanur 38 tashi tezüng agi mapa junga meinyakba yong anepalua liasü aser parnok lendong nung lir.

Israel nungeri bomb pokloktsüba mechi nisung 1,000 iba tesem nung jenoka lir ta ashir.

Gaza nung mozüki 35 aliba nungi 18 shibangogo, primary healthcare clinics 72 aliba nungi 51 shibangogo aser ambulance 57 raksatsü ta ashir.

ANGCTA Triennial Conference... (Tapak 2 nungi...)

Stream ka-ka dang aliba college tem derecognize asütsü aser NEP 2020 kübok reju ajak multidisciplinary asütsüla, ta pai ashi.

Skill ya Higher Education indang tongtipang component ka asütsü aser kaketshir indang skill development temolung nung yur Department of Higher Education, Nagaland ajanga Aviation training agütsütsü asoshi IDAN den MoU ka zülutepa North East kübok iba mera agiba state mezüngbuba Nagaland akumer, ta pai ashi.

2040 tashinung NEP 2020 indang norms aser numbers derecognize asütsü, ta Dr. A. Nshoga-isa ashi.

Nikongdang Technical Sessions ana liasü aser yangji

college balala nungi shilem agirtemi onük balala nung presentation papers agüja liasü.

Ananü mungdang tembangba sentong nung menden Dr. Imliwati Longkumer, Assistant Professor, Fazl Ali College, Mokokchung liasü aser Dr. Medongulie Zatsu, Joint Secretary, ANGCTA ajanga pela agizükba o jembiba sülen ZGCTA ajanga ken ka aten.

Dimapur Government College nung skill based education balala agütsüba indang slide show sayua liasü.

Alakteta jaoker, Nagaland Angh La Ganesan sentong nung medentetba yong pai züluba shiti ka A. Moamongla Aier ajanga zünga ashi aser laisa melepzüng o jembia sentong tembang.

BILEMDANGANG

"Mapang tatsüka alitsüba lima ka asoshi masü saka tatem maka alitsüba lima asoshi renemang."